



Siverth K. Heilmann

UPA 2022/126

Atassut

1. juni 2022

Meeqqatta inuunerup aqputaani unammillernarsinnaasut pitsaanerusumik anigornissaanut qanoq eqqarsartaatsikkut nukittunissaanik tuniorarsinnaanerigut, oqallisissiatut siunnersuut.

(Inatsisartunut ilaasortaq Nivi Olsen, Demokraatit)

Siunnersuuteqartumut qujanaq, Atassummiillu qanoq kinguaatta tarnikkut nukittullutik inuunertik ingerlassinnaaneraat pillugu oqaaseqalaassaagut.

Angajoqqaajulluta akisussaaffipput annerpaaq tassaavoq meeqqatta toqqissisimallutik peroriartornissaat, namminiilernissaannullu piareersarlugit. Ilaqutariinnermi sukarsuuvoq pingaarnerpaaq.

Inoqaterpassuaqarpugulli tujorminangaartunik meeraanermi aqquusaagaqartarsimasunik, immigassamik ikiaroorartumik atuiffiusuni, meerarpassuillu aamma atornerlugaasarsimapput inuunermiq sequtseringaartumik qaangeruminaalluinnartumillu.

Meerarpassuit taakkuninnga aqquusaagaqarsimasut ilarpassuisa ilikkangitsoortarpaat inersimasunngorunik akisussaassuseqarnissaq, imminullu napatissinnaanissaq. Nammineerlutillu angajoqqaanngoraangamik meeraallutik atukkatik ajoraluartumik aamma meeqqaminnut ingerlateqqissinnaasarpaat.

Uagut Inatsisartuniit akisussaaffipput tassaavoq inuiaqatigiit peqqissut akisussaassuseqartutullu misigisut. Atassummiillu pingaartittuagarput tassani aamma qitiuvoq, tassa peqqinnissaqarfitta pitsanngorsarujussuarnissaa. Inuk peqqissoq inuiaqatigiinni sulilluurtuummat.

Aap politikkeriniit ilinniaqqusilluta oqariartortuarsimavugut ukiorpassuannortuni. Allaammi periarfissiinikuuvugut akeqanngitsumik ilinniarsinnaanermik. Qaavatigullu ilinniartut akissarsiaqartittarlugit. Meeraq peroriartornermini angajoqqaaminiit kaammattorneqarluaruni ilinniakkaminiit naammassinnissinnaalluarpoq.

Immitsinummi aperisariaqalerpugut, ukiorpassuarni politikkikkut anguniakkatsinni arlaannik kukkussuteqarsimanerpugut inuiaqatigiinni imminortarnej, ikiaroorartoq, imigassaq, kinguaassiuutitigut atornerluisarnej suli annertuumik ajornartorsiutigigatsigit? Atassummiillu uteqqiinnassavara, ila inuk qitiutinnerullugu sulisariaqalerpugut.

Politikkikkummi nukipparujussuit atornerqarsimapput namminiilivinniarnermut. Immaqa eqqarsartoqartarsimassaaq namminiilivikkutta inuiaqatigiinni atukkat pitsanngorumaartut.

Killormoorporli. Inuiaqatigiinuku peqqissut toqqissisimasullu namminiilivinnissamut nukissaqarlutik sulisussat. Tamanna nassuerutigisariaqaliivipparput.

Ukiorpassuarnimi assiliangortillugu illup pujoorfia qaliaalu sananiarsarisimavagut, aali illup toqqavia suliareqqaartussaagaluarlugu. Taamaammat inuk qitiutinnerullu sulilertariaqarpugut namminiilivinnissaq qitiutinnagu. Inuup peqqissup toqqissisimasullu naalagaaffinngornissaq angussaqaarmagu.

Qitiusumiit aqutsinerujussuaq annikillisartariaqarparput, inuit kiffaangissusaat annertusarlugu. Inuk kiffaangissusilik akisussaassuseqartutut misigisarpoq. Akileraarujussuartilluta, iluamillu nakorsiarsinnaatinnata, kigutilerisumukarnissarluunnit ajornakusuissortillugu, inissiat aserfallannikut, aqqusernit aqqissugassat, ila taakkununnga akileraaruterparujussuit atorneqanngippata sumunuku taava pisartut?

Akileraarut appartikkutsigu inuit piumassuseqarnerlissapput sulinissaminnut, uninngaannarnermiit. Appartinneratigullu namminersortunngornissaq suliffeqarfimmillu aallartitsinissaq orniginarnerulissagaluarpoq.

Allat pisuuteqattaarunnaarlugit nammineq inuunitsinnut akisussaaffimmik tigusinerulertariaqarpugut. Uagullu politikkerit Namminiilivinniarnarujussuaq taamaallaat qarasarrioriunnaarlugu innuttaasut peqqissuunissaat pingaartinnerulertariaqarparput. Inuup peqqissup, akisussaassuseqartutullu misigisup, meeqqami timikkut tarnikkullu nukittunissaa isumagiumaarmagu.